

# QUÆSTIONES MEDICÆ

## S E X.

### AB

#### ILLUSTRISSIMIS VIRIS

R. D. ANTONIO MAGNOL, Decano Venerando,  
HENRICO HAGUENOT, JACOBO LAZERME,  
FRANCISCO DE SAUVAGES, CAROLO  
SERANE, FRANCISCO DE LAMURE,  
FRANCISCO IMBERT, R. D. MAGNOL, Coad-  
jutore, Regis Consiliariis, Medicis & Professoribus  
meritissimis.

### PROPOSITÆ

IN AULA EPISCOPALI MONSPELIENSI  
coram Illustrissimo ac Venerabili D. D. FRANCISCO  
GABRIELE DE POMIÉS DE ST. BONNET, Doctore  
Sorbonico, Abbate Sancti Policarpi, & Vicario Generali.

*Pro Regiis Cathedris Chimiæ & Botanices in unam conjunctis ex  
Decreto Sanctioris Consilii, vacantibus in Universitate Aquisextanâ.*

Per obitum K.R. DD. STEPHANI BERTIER & JOSEPHI BEGUE,  
Regis Consiliariorum & Professorum meritissimorum.

*Quas Deo favente, & auspice Deiparâ, propugnabit in Augustissi-  
mo Monspelienfis Apollinis Fano, triduo integro manè & sero,  
diebus 6, 7 & 8 mensis Julii anni 1753.*

JOSEPHUS - LUDOVICUS GOYRAND, Aquisextanus;  
D. M. M.



### MONSPELII,

Apud JOANNEM MARTEL, Regis, Occitaniæ Comitiorum,  
& Universitatis Typographum. 1753.

**DEO**  
**UNI ET TRINO,**  
**VIRGINIQUE**  
**DEI-PARÆ;**

**D. D. D. C.**

**JOSEPHUS-LUDOVICUS GOYRAND.**





# QUÆSTIO PRIMA.

*AN DISSENTERIÆ CURANDÆ CONVENIANT  
vomitoria, & quanam è regno vegetabili sint potissimum  
eruenta?*



INTER varias alvi fluxus species vix ullam  
dissenteriâ pejorem reperiēs. Hanc definimus  
frequentem, plerumque paucō sanguine in-  
termixto cruentam, rariùs purulentam mate-  
rierum mucosarum dejectionem, ventris tor-  
minibus semper stipatam. Ex hâc definitione  
attendenti patescit quibus hæc symptomati-

bus ab aliis intestinorum affectibus tutissimè distingui queat.  
His nonnulla alia cum benè multis morbis communia symp-  
tomata se adiungunt: virium nempe prostratio, sitis, quan-  
dòque ineunte præsertim dissenteriâ vomitus, plerumque fe-  
bris, &c. Dissenteria modò à solo intestinorum vitio oritur.  
Modò ab alio morbo febre nempe putridâ, malignâ, sobo-  
lescere observatur. Nunc levibus faciliq̃ negotio evanescen-  
tibus symptomatibus, nunc gravissimis multumque periculi  
portendentibus stipatur. Plerumque paucos tantum corripit,  
aliquotiès epidemicè in castris potissimum grassans, imò &  
solo (a) halitu è fœcibus hoc morbo affectorum expirante  
contagiosa, immaniter debacchatur; indè fluunt multiplices  
Dissenteriae differentiæ,

(a) Degnerus historia medica de dissenteriâ passim.



Causam hujus continentem reponendam censemus, in humore quodam acri nerveam intestinorum tunicam, vellicante imò & inflammante, nisi inflammationis jam natæ soboles non extiterit, citatiorem horum peristalticum motum ciente. Hâc enim positâ videntur Dissenteriae symptomata non difficulter posse explicari. Ac 1°. Quidem crebræ erunt ac iteratæ dejectiones, quòd ad sui contractionem frequentiùs stimulabuntur hoc acri humore irritata intestina, undè contentorum ad podicem appulsus celerior. 2°. Cruentæ, vasa enim tùm adaucto sanguinis impetu impenfiùs dilatata, tùm ab acribus & interiùs & exteriùs impetita dilacerabuntur, undè sanguinis intra intestinalem tubum effusio. Quod de nonnullis minoribus vasis intelligendum est. 3°. Mucosæ observabuntur. Iteratis nempe intestinorum contractionibus mucus villosam tunicam naturaliter obducens abradetur, quibus pariter intestinalis humor, remorâ utpotè in vasis suis cohibitus, & adaucto partis calore spissior, exprimetur; porrò uterque alvinarum fæcum in dissentericis maximam partem constituit. 4°. Torminibus stipabuntur. Nequè enim contrahi possunt musculares intestinorum fibræ, quin subjectam tunicam nerveam exquisitiori, præ inflammatione, sensu donatam premant: neque alvinæ fæces per intestina inflammata provolvi quin doloris sensum inducant. Febrem verò nunc à materiâ putridâ è primis viis in sanguinem devectâ, nunc à vehementiâ torminum vel ab ipsâ inflammatione ad certum usquè provectâ gradum pendere arbitramur.

Inter causas Dissenteriae remotas jure meritò annumerabis quaecumque sanguini majorem vel acrimoniam vel spissitudinem conciliant. Tales sunt horœi fructus præsertim immaturi; fermentati liquores potissimum nondum absolutâ fermentatione copiosius epoti, frigus æstuante corpore admissum, aëris constitutio, &c.

Inflammatiō & tormina Dissenteriam periculosam faciunt, eò tamen periculum majus quo ambo illa intensiora, majus adhuc si adjunctam habeant febrem, præsertim exacerbantem



tem putridam, & à fortiori malignam. Timenda intestino-  
rum exulceratio, multò magis gangræna. Hanc enim effectū  
necessariò mors sequitur.

Dissenteria mederi non poteris nisi inflammationis sympto-  
mata mitiges, materierum acrimoniam retundas, tormina  
compescas, & peccantes succos tandem elimines. Prioribus in-  
dicationibus satisfaciunt venæ sectiones è brachio, diluentia,  
refrigerantia, edulcorantia, mucilaginosà, formâ potionis,  
fomenti, enematis, adhibita. Tertiæ narcotica eâque non  
parcâ manu administrata. Quibus variis fracta torminum &  
dejectionum ferociâ cathartici mitioribus utendum; vel po-  
tiùs nisi vetent sanguinis exiturientis copia, intensior febris, ex-  
quisita nervorum tensio, temperamentum biliosum, ad eme-  
tica mediocris energiæ confugiendum est: Præsertim cum in  
ventriculo ingentem nidulari saburram denotant, lingua  
conspurcata, oris fœtor, & febris exacerbationes. Sed hæc  
medicamina è regno vegetabili desumenda sunt; utpotè quod  
præparatis chemicis mitiora esse docuerit experientia. Cla-  
mat eadem radicem brasiliensem omnibus aliis ex eodem reg-  
no depromptis palmam præripere. Non tantum enim morbi  
fomitē eliminat; sed & adstringentis vices gerit, sive ef-  
fectus ille terræ ipsius absorbenti, uti nonnulli volunt, tri-  
buendus sit, sive refinosa suâ parte, quod multis magis ar-  
ridet, glutinosas materies acribus fœtas solvendo eundem  
effectum præstet; undè etiâ fractâ dosi aliis adstringentibus  
sociata sæpiissimè adhibetur. Ex quibus concludimus.

*Ergò Dissenteria curanda conveniunt vomitoria & patet quodnam  
è regno vegetabili sit potissimum eruendum.*







## QUÆSTIO SECUNDA.

### *An Epilepsia Pulvis Algaroth?*

**E**PILEPSIA est subitanea sensuum omnium abolitio, aut imminutio summa cum totius corporis, aut nonnullarum partium convulsione, aut concussione involuntariâ, sæpius violentâ per paroxismos recurrens. Hinc ab insultu epileptico distingui poterit, affini quidem morbo, attamen solâ naturæ ope evanescente, fugaci, non recurrente. Quod apprimè notandum. Vigente Epilepsiae paroxismo sensus interni externique feriantur, vel maximè imminuuntur; totum corpus aut plures partes violentis concussionibus exagitantur, vel nonnullæ tantum, iisque mitioribus. Quæ diversitas perfectam & imperfectam Epilepsiam constituit. Aliæ occurrunt Epilepsiae divisiones in idiopathicam, sympathicam, &c. Quarum explicatio ex infra dicendis elucescet.

Inæqualis spirituum animalium ad nervos motibus voluntariis famulantes appulsus, naturali tamen major, cum eorumdem parcâ admodum aut etiâ nullâ in nervis organis sensuum prospicientibus secretionem, causam Epilepsiae continentem ponit. Non aliud enim innuere videntur symptomata morbi essentialia, videlicet subitanea sensuum feratio aut imminutio summa, cum convulsionibus aut motibus convulsivis conjuncta. Hanc verò proximè inducit inæqualis, vel constans nervorum memoratorum in suâ origine compressio à sanguine cerebrum irrorante; cui ansam sæpius præbet sanguiferorum hujusce partis vitium organicum, sive à parentibus transmissum, sive congenitum, aut post nativitatem quâvis de causâ adscitum. Hæc autem vasorum cerebri organica labes paroxismis epilepti-



cis inducendis apta, ut probat apertura cadaverum, fita est in dispositione arteriarum anevrismaticâ, aut varicosâ venarum quas sæpius arteriis præternaturalem pati dilatationem ob earum textum debiliorem verisimillimum est. Nequè tamen hæc unica inæqualis vasorum cerebri infarctus causâ censenda est, cum dentur aliæ plures repetitis observationibus demonstratæ: Tubercula nimirum in substantiâ cerebri genita, glandulæ pituitariæ intumescencia, serum cerebrum laxans ventriculos replens indèque substantiam cerebri comprimens, pus aut sanies ichorosa, cranii caries, exostosis tabulam internam occupans, &c. His positis cerebri vitiis non propterea paroxysmus inducitur, nisi insuper sanguini vitia accedant, quæ illius difficilem, inæqualem tamen, trans substantiam cerebri circuitum reddant; porro difficile vasa cerebri permeabit sanguis copiosior, crassior, aut nimium rarefactus aut fervidior. Erunt ergo causæ Epilepsiæ procatharticæ quæcumque prædictis vitiis sanguinem inficere poterunt. Tales sunt exercitia immodica, vini liquorumque ardentium abusus, venus immoderata, evacuationes solitæ suppressæ, animi mœror, &c. Imprimis pravi succi è primis viis in sanguinem devecti, quibus hic aut inspissatur, aut in æstum nimium concitatur. Hactenus de Epilepsiâ idiopathicâ. Verum observatur & alia quæ sympathica nuncupatur; quæque debetur ut plurimum ulceribus sinuosis, fistulosis, aut ossibus carie tentatis, ob puris miscelam cum sanguine. Hinc persæpè sensus auræ frigidæ in parte affectâ vel in toto corpore perceptus, Epilepsiæ sympathicæ non rarò prodromus. Ex datâ Epilepsiæ theoriâ fluit symptomatum ipsius essentialium explicatio; quod verò symptomata spectat essentialibus adungi solita, ut stertor, nonnumquam vociferatio, spuma in ore, fæcum, urinæ, seminis excretio, nunc faciei rubor, nunc livor, nunc pallor; pulsus nunc plenus & validus, nunc debilis & lentus, calor nunc adauctus, nunc imminutus, ex iis alia, motibus spasmodicis, alia sanguinis



rarescentiæ ; alia ejusdem inspissationi sunt tribuenda.

Epilepsia periculosa semper, utcumque ipsius accessus plerumque spontè sanabiles. Potest enim in appoplexiam aut alium affectum soporosum abire. Hæreditaria numquàm, adventitia quandoque sanabilis, modò tamen vigesimum quintum ætatis annum æger non superaverit. Sympathica curatu omnium facillima.

Duplex instituenda est Epilepsiæ curatio tempore nimirum paroxismi & extrà paroxysmum. Tempore paroxismi, si fortis non fuerit sibimet æger relinquendus; ità tantùm collocandus ut liberè spiritum hauriat, nec agitata membra à corporibus obviis lædantur; sin minùs ea usurpanda medicamina quibus appoplecticis succurritur.

Extrà paroxysmum in id sedulò Medicus incumbat ut pravam sanguinis diathæsim emendet causasque foventes removeat. Itaque diætâ accuratâ, venæ sectionibus, refrigerantibus, attenuantibus appropriatis, pro re natâ adhibitis, emeticis, purgantibus, si non Epilepsiam sanare saltem mitigare, ipsius accessiones leviores aut minùs frequentes reddere satagat. Emetica præ primis cæteris palmam præripere experientia comprobat; inter quæ annumeratur Pulvis Algaroth. Verùm cum Emeticum illud potentissimum sit, imò & acido marino regulinis partibus adhærescente, nec iteratis lotionibus separato aliquatenùs causticum, tunc tantùm præscribendum videtur cum in forti paroxismo alia incassum fuère adhibita; undè sub hoc respectu concludimus.

*Ergò Epilepsiæ Pulvis Algaroth.*



QUÆSTIO





## QUÆSTIO TERTIA.

*An morbis inflammatoriis Radix Seneca?*

**M**ORBORUM inflammatoriorum numerus & frequentia, ingens quò stipantur discrimen, varii quibus terminantur exitus, curationis difficultas merentur, ut in illis apprimè cognoscendis, iisque detegendis præfidiis quibus debellari queant, omni ope Medicus annitatur. Morbos autem inflammatorios seorsim faciliùs noscet, si generalem priùs inflammationis historiam probè perspectam habuerit, cui igitur paucis delineandæ incumbemus.

Ut iis symptomatibus, quæ in omni tùm externâ, tùm internâ inflammatione sensibus obvia sunt, definiatur inflammatio: censemus hanc calore in parte quâdam determinatâ præternaturaliter adaucto, & dolore huic etiâ parti relato, esse definiendam. Nulla est enim inflammationis species, in quâ hæc duo symptomata evidentissimè observare non liceat. Præter hæc, in inflammatione quæ exteriora corporis occupat, alia visuntur. Tensio nempe, tumor & rubor. Sed quàmquam analogiâ & aperturis cadaverum certissimè constet, hæc eadem ab internâ inflammatione pariter induci, cum tamen ex his rubor numquàm, tensio verò & tumor plerùmque sub sensus non cadant, hinc videntur à definitione inflammationis symptomaticâ jure meritò expungenda.

Duas generales inflammationis species statuunt Medici, ad quas omnes alias revocare solent, phlegmonodæam scilicet, & erysipelatofam.



Fatendum tamen non paucas reperiri inflammationes, quæ ad neutram ex memoratis referri possunt, uti & etiã dari nonnullas quæ utriusque indolem videntur sapere.

Utraque dividitur in externam & internam. Externa phlegmone his se signis manifestat tumore satis elato circumscripto, tensione magnâ, intensâ rubedine, calore, nullum acrimoniæ sensum inferente, dolore pulsatili, id est, singulis cordis contractionibus recrudescente. Interna, eâdem caloris specie, dolore pariter pulsatili, utcumque si profundius sita fuerit magis obscuro, naturâ educti sanguinis, &c. ab erysipelatode distinguetur. Hæc externa, tumore vix ullo, diffusio, colore rubro-roseo, calore mordaci, seu cum sensu urentis acrimoniæ conjuncto, uniformi, ut ita dicam dolore, ab alterâ discrepat. Interna autem dolore & calore huic speciei inflammationis peculiaribus.

Præter memorata symptomata alia benè multa sibi adjungit inflammatio prout in varias partes decumbit. Sic si cerebri meninges invaserit, modò delirium phreniticum, modò soporosos affectus inducit. Si organa deglutationi famulantia adoriatur, deglutationem, si pneumatica respirationem lædit. Si ventriculum, intestina, hepar, renes, vesicam, &c. ea omnia accersit symptomata, quæ à læsione functionum quibus hæc viscera dicantur, dependent. Porro interna inflammatio, modò alicujus momenti fuerit, febrem comitem sibi semper adsciscit.

Pone sanguinem majori in parte determinatâ copiâ aggestum eumque, ab adauctâ vi cordis trusiva, celerius motum, & causam inflammationis continentem habebis. Hæc enim caloris augmentum productum iri, majorique solidis illatâ tensione, dolorem fore excitandum evidenter patet. Nec difficiliore negotio cætera inflammationis symptomata ex datâ causâ erues. Porro hæc obstructionem sanguineam, id est sanguinis in suis vasis hærentiam necessario supponit. Quam latè itaque patet inflammationis sedes! Poterit hæc ubicumque adsunt vasa sanguinea, &



nullibi fermè deesse probaverunt injectiones Ruifchianæ, produci. Nùm verò in omnibus omninò sanguiferis ? videntur venosa obstructioni sanguineæ prorsus inepta, nisi vis exteriùs comprimens accesserit. In his enim à strictiori in ampliorè alveum sanguis protruditur. In arteriis autem minimis in acumen definientibus, si quâcumque de causâ, vel imminuatur diameter, vel globulorum sanguineorum crescat moles, sanguini transmittendo non facilè superandus obex exurget; undè etiàm lymphaticorum dilatata oscula globulos rubros admissura sunt.

Causæ inflammationem remotè producentes numero infinitæ, in genere revocari possunt ad ea omnia quæ sanguini lentorem, siccitatem & acrimoniam conciliant, vel nimiam solidis rigiditatem, aut etiàm laxitatem inferunt, vel ad ea tandem quæ exteriùs applicata comprimendo, corrodingo, &c. vasorum diametrum minuunt, spasticas stricturas inducunt.

Multiplex est inflammationis exitus. Resolutione, suppuratione, schirro, gangrænâ terminatur. Ex his resolutio semper nisi in externis tumoribus criticis optanda; suppuratio in internis potissimùm, induratio, gangræna, omni artis molimine præcavenda.

Symptomatibus suprâ recensitis, non solùm distinguitur externa ab omni alio affectu, sed & quoquè diversa ejus species. Internam adesse tutò pronuntiabitur quotiescumque determinatæ parti dolor fixus inerit, calore intenso & febre continuâ stipatus. Quodnam verò adoriatur viscus detegget, symptoma ex istius læsâ functione oriundum.

Nullam quantumvis levem, periculi expertem inflammationem Medicus asserat; cùm nulla sit quæ propter summam sanguinis discrasiam pessimum non possit exitum fortiri. Attamen juxtà communes naturæ leges, externa, levis, febre carens, omni periculo vacat. Interna verò semper periculosa, eoque magis quò viscus quod adoriatur, vitæ perennandæ magis necessarium, aut exquisitiori sensu pollet.



Inflammationem quamcumque sanare si velis, molem sanguinis minuas oportet, venæ sectionibus prudenter iteratis, rarefactionem compescas refrigerantibus, acrimoniam edulcorantibus retundas, saburram sæpè sæpiùs morbi fomitem, summâ tamen cum cautelâ, elimines catharticiis aut emeticis. Iis auxiliis, mitigatis quamplurimùm symptomatibus, ad reliquias inflammationis discutiendas nihil accommodatiùs quàm diaphoretica, inter quæ seligi potest Radix Seneka, quæ species est poligalæ in Virginiâ crescentis, cujus egregii effectus, in resolvendo sanguine concreto inflammatorio, analogiâ primùm, deindè innumeris experimentis D. Tennent Medico Anglo in Virginiâ innotuere. Undè hanc, pleuritidis & perineumonix præsertim, unicum specificum dixerit; verùm cum hæc Radix attenuans sit energicum, videtur cum cautelâ, in his saltem regionibus, usurpanda, & huic forsàn Poligalæ vulgaris nostræ radix utpotè mitior, in benè multis casibus foret anteponenda; undè sub hoc respectu concludimus.

*Ergò morbis inflammatoriis Radix Seneka.*



## QUÆSTIO QUARTA.

*An in affectuum soporosorum curatione emetica antimonialia aliis sint præferenda, & quenam ex illis debeant seligi?*

**M**ORBI soporosi sic dicti quòd somnum præternaturalem tamquàm symptoma essentialè, & signum sui pathognomonicum, adjunctum semper habeant, varia sortiti sunt nomina pro diverso soporis gradu, & aliis concomitantibus



tibus symptomatibus. Sic adest appoplexia cùm subitanea ingruit omnium sensuum motuumque voluntariorum abolitio laxatis membris, & respiratione aliquatenus ferè semper læsa. Carus quandò, è somno profundo naturali somni verâ imagine validâ vociferatione aut puncturâ excitatus æger, interrogatis non respondet, sed subitò in somnum relabitur: coma somnolentum, cùm non solùm oculos aperit, punctaque membra retrahit ut in caro, sed & interrogatis respondet. Lethargo correpti difficili negotio excitati respondent, delirant, illicò in somnum relabuntur, & febre continuâ laborant. Hi quotquot sint & alii congeneres morbi, primarii vel secundarii, simplices vel complicati, non aliam agnoscunt causam immediatam, quàm compressionem pro vario soporis gradu variam, sed semper æqualem, nervis qui motibus vitalibus non famulantur in suâ origine illatam. Hanc inferre queunt & sæpè inferunt ossa bregmatis intùs trusa, tubercula, exostoses, sanguis, pus, aqua, in cavo encephali collecta, vasorum sanguiferorum nervis incumbentium aut iis adjacentium præternaturalis dilatatio, nunc à sanguine, plethorico, rarefacto, celerius moto, non rarò obstructionem inflammatoriam in cerebri substantiâ producente, nunc à sanguine lentefcente pituitoso. Si ad superiora attendatur, morbos soporosos cognoscere non erit arduum. Sed non satis est Medico morbi speciem nosse, nisi causam pariter, quantum per artem licet, detegere satagat. Capitis exploratio, & prægressorum cognitio hunc docere poterunt, an ejus depressio, pus, aut sanguis extravasatus cerebrum comprimant: tubercula aut exostoses suspicari tantùm poterit. Serum accusandum esse denotant ægri temperamentum, faciei artuumque intumescencia, œdematosa capitis moles grandior, & præsertim his adjuncta futurarum dehiscencia. Sanguini vasa sua prætermodùm dilatanti morbum deberi, indicant subitanea morbi invasio, prægressis capitis gravedine, membrorum torpore, oculis tenebrosos. Sed sanguinem ingurgitantem, pleniorâ verâ seu copiâ adauctâ peccare arguunt, cohibita ali-



qua evacuatio notabilis, victus lautior, atro-rubicunda facies, pulsus plenus, temperamentum sanguineum. Sanguinis, plethorâ falsâ, seu rarefactione comprimentis, indicia sunt roseus faciei color, corporis calor adauctus, pulsus velox præsertim si cum temperamento bilioso præcesserint liquorum ardentium abusus, ira longior, insolatio. &c. Infarctum dari inflammatorium, si cum signis alterutrius plethoræ, febris continua exarserit cum delirio tutò pronuntiabis. Demùm à sanguine lentefcente & pituitoso nimium distendi vasa cerebri eruetur ex pulsu debili & tardo, cum faciei pallore, externarum partium refrigeratione, aut calore naturali admodum imminuto in ægris pituitoso antea temperamento donatis.


Hos omnes morbos admodum periculosos esse spontè patet, metus est enim nè ulterius evectâ compressione, omnis omnino nervis quibuscumque spirituum animalium influxus denegetur; undè citò machina corrueret. Attamen eò majus periculum quò profundior somnus majorque laxitas, & quò simul causa comprimens sublato difficilior. A tuberculis, exostosis, & sero collecto exorti, lethales necessariò sunt, in senibus, recidivam patientibus, aut alio morbo jam fractis, cæteris paribus multò quàm in aliis peiores.

Si tollatur causa comprimens æger sanitati restituitur. Depressum itaque cranium trepani ope citò elevandum, ut sanguis vel pus educantur. Exuperans sanguinis copia venæ sectionibus in brachio talo & jugulo minuenda, multoties etiàm iterandis, potissimum si infarctus inflammatorius adfuerit; rarefactio sanguinis, phlebotomiâ pariter, & refrigerantibus compescenda. Tardigradus sanguinis motus in frigidis & pituitosis exsuscitandus cardiacis & præsertim emeticis quæ miròs præstant effectus, ubi primarum viarum sordes morbum foveant: quòdquidè sæpius observare contingit, quàm nonnulli arbitrantur. Insuper excitatis in toto corpore succussibus, experge faciendis ægrotantibus mirè conducunt. Hæc autem medicamina ex antimonialibus vulgò desumuntur. Notandum tamen à vegetabilibus, eos quandoque produci



effectus quos mineralia negavere. Inter antimonialia verò, ubi citissimo effectū opus est vinum emeticum seligendum; quod si hoc acidum factum propinari nequeat, tartarum stibiatum solubile in mero aut potione cardiacâ dissolvatur. Si verò diuturnior expetatur actio ad materies viscidas infringendas tartarum non solubile exhibendum. Quibus irritis ad vitrum antimonii, vel pulverem algaroth Medicus confugiat; unde concludere licet.

*Ergò in affectuum sopororum curatione emetica antimonialia aliis sunt preferenda, & patet quanam ex illis debeant seligi.*



## QUÆSTIO QUINTA.

*An Hæmoptysi curandæ proſit adstringentium uſus & quorumnam ſelectus iſtituendus eſt, dùm ea deſumuntur è regno vegetabili?*

**N**ULLUM eſt viſcus frequentioribus gravioribusque morbis obnoxium quàm pulmo. Si ad mollem ipſius texturam, ſanguinis tranſluentis impetum, perpetuos inſpirationis & expirationis motus, varias aëris ſubeuntis noxas attende-  
ris, ratio impromptu erit. Inter ipſius affectus Hæmoptyſis ſingularem Medici attentionem expoſtulat, tùm per ſe, tùm quia pulmonalis phtifeos in his regionibus vulgatiffimæ frequentiffima eſt parens. A ſanguinis enim ſputo, puris ſputum, à puris ſputo tabes. *Hippo.* Si itaque ſanguis per os cum tuſſi, reſpiratione plerùmque nonnihil difficili, ardoris, punſtionis vel quaſi rupturæ ſenſu, ſpumofus & floridus ejicitur hæmop-



thyfis ægrum afficere dicitur.

Hanc plerumque antecedunt, tenella pulmonum fabrica à parentibus sæpissimè transmissa, crasis sanguinis ad acrimoniam vergens, natæ in vasis pulmonum lymphaticis obstructions; quibus causis vel nimium dilatari vasa, vel angustari sanguinis exindè circuitum intrà pulmones retardari extrà dubium est.

Memoratarum causarum effectus accelerant plethora, sive hæc suppressis evacuationibus solitis, sive nimiae ingestorum copiae, sive sanguini abusu, liquorum ardentium, alimentorum acrium salinorum, aromaticorum rarefacto debeatur, nonnullarum eruptionum cutanearum, uti erysipelatis scabiei, &c. retro-pulsio & ad pulmones decubitus, quæcumque pulmones validè concutiunt atque exagitant, uti risus immodicus, vociferatio, cantus diutiùs protractus, instrumentorum musicorum inflatio, corporum contudentium vis pectori applicata, &c. His causis nonnulla pulmonalia vasa dilacerabuntur, corrodentur. Effusus sanguis tùm acrimoniâ, tùm contactu simplici internam bronchiorum membranam exquisitissimo sensu donatam vellicabit; undè tussis, sanguinis coccinei, spumosi utpotè cum aëre permixti expectoratio, &c. notandum tamen non rarò hæmophtises occurrere, quæ nec vasorum rupturæ, nec eorumdem corrosioni videntur tribuendæ, sed meræ vasorum pulmonalium secretoriorum & excretoriorum dilatationi, quòd præcipuè in foeminis menstruorum suppressionem patientibus observare licet.

Allatis signis certò innotescet ejectum sanguinem è pulmonibus prodire, neutiquam verò in os ex aliis partibus confluere; quibus si antecedentes causas adjunxeris, firmiorem habebis diagnosim.

Quanto in periculo versentur hæmopthoici ex prægressis erui potest. Dilaceratis enim paulò majoribus vasis, tanta potest cruoris copia intrà vasa aërea effundi, ut aëris ingressui omni denegato aditu, subitò de medio tollantur. Quòd si minora tantùm soluta fuerint metus est nè iis in suppuratum abeuntibus



abeuntibus , in phtysim pulmonalem seriùs ocyùs certissimè lethalem conjiciantur. Fauistiùs ominandum de illâ hæmoptysi quæ à solâ prædictorum vasorum dilatatione natales habet.

Unica quamquàm sit in hoc morbo indicatio princeps vasa nempe claudere , non eadem tamen semper in eo curando calcanda via est. Venæ sectionibus namquè præcipuè insistendum cùm à plethorâ verâ oritur ; & præprimis si notabilis aliqua evacuatio cohibita fuerit. In quo casu post amotum majus periculum , huic cohibitæ evacuationi restituendæ omni artis molimine incumbendum est. Si sanguinis rarefactio accusanda veniat , præmissis venæ sectionibus , refrigerantia potissimùm usurpanda ; si autem prædominans sanguinis acrimonia , frustrâ alia cujuscumque generis sint præsidia adhibebis , nisi ad lacticinia tamquàm ad sacram anchoram confugas. Hæc diuturno usu mira in hoc morbo præstant. Quibus variis auxiliis adjungi debent , non omissis tamen absorbentibus , adstringentia. Inter quæ eminent urtica , plantago , radix simphiti majoris , bistortæ , tormentillæ , &c. Ac præprimis urtica cujus succum egregiè conducere quotidiana experientia demonstrat undè concludimus.

*Ergò Hemoptysi curanda prodest adstringentium usus , & patet quorumnam selectus instituendus sit , dùm ea desumuntur è regno vegetabili.*







## QUÆSTIO SEXTA.

*An Spina bifida sit morbus curabilis nec-nè, & an chemia remedia quapiam suppeditet ad hunc morbum radicitus curandum vel palliandum?*

**F**ŒTUS in sinu materno variis morbis esse obnoxios, nemo est qui ambigat. Sivè enim materni humores à quibus pabulum & incrementum assumunt vitientur, sivè propter ingentem vasorum & viscerum debiliorem fabricam, hos utcumque sanissimos in indolem tenello suo corpori nutriendo aptam convertere nequeant, sivè demùm validiores succussus patiantur, patet multifariam inde fœtus morbosè afficiendos. Nullus autem morbus est à quo ipsis in lucem editis, citius certiusque vitæ periculum imminet, quàm ab eo tumore qui spina bifida apud Medicos audit. Hoc enim vel per artem, vel spontè aperto, præsentissima inde exurgit perniciēs, undè sola primo intuitu sanationis spes affulgere videbatur.

Est autem spina bifida tumor cysticus fœtibus congenitus variæ molis, varii coloris, majori in centro quàm in reliquis partibus mollitiæ donatus, plerumque superficie corrugatus, sic tamen ut eò crescente rugæ evanescant, quandoque suâ epidermide spoliatus, ut plurimum in lumbis sæpè etiàm in dorso, rarissimè ad nucham, & ad parrem inferiorem exteriorem ossis sacri enascens. Morbus hic de quo filuerunt omninò veteres, perfunctoriè admodum à nonnullis recentioribus describitur. Undè cùm nondùm mihi hunc observasse contigerit, vix ac nè vix quidem impositam provinciam adimplere potuissem, nisi Illustissimus hujusce Licæi Professor D. Imbert illius accu-



ratissimam descriptionem dedisset, in egregio tractatu quem de tumoribus recens edidit, pluribus observationibus, ac præprimis duab. D. Fargeon, D. M. M. Regiæ Scientiarum Societati communicatis suffultam, è quibus omnibus theoriam hujusce tumoris lege severi ratiocinii elicit sic ut ad perfectam spinæ bifidæ cognitionem nihil amplius desiderari videatur. Ex cujus igitur opere quæ sumus dicturi mutuabimur, quemadmodum datam jam descriptionem mutuati sumus

Tumoris hujus causa continens est feri intra spinalem medullam & ambientes membranas accumulatio, ejusque cum membranis coercentibus extrorsum propulsio. Serosam hic coluviem fieri demonstrant observata, quibus constat ex tumore integro aquosum laticem exsudasse & ex eo disrupto magnâ copiâ effluxisse. Sæpè tamen in hujusce cavo, notabiles fasciculi nervei à medullâ spinali emissi reperiuntur. Nequè credideris peculiarem inibi, hydropem gigni adeoque spinam bifidam inter morbos essentialia recensendam. Semper est hydrocephali symptoma quod ex observatione præsertim, secunda clariss. D. Fargeon sic evincitur, ut pro demonstrato haberi queat.

» Itaque si in foetu (a) aquosus ille latex quo in hydro-  
 » cephalo interno obruuntur cerebri substantia, ventriculi,  
 » membranæ ipsius inflectat cursum magnum foramen oc-  
 » cipitis facilis erit descensui via per patentem ductum spi-  
 » nalem, sensim & sine sensu coacervabitur liquor & tandem  
 » copioso proventu distendet modò hîc modò illîc membra-  
 » nas involventes quæ suâ vice erumpent in cartilagineas, fle-  
 » xibiles facilèque dehiscentes vertebrarum spinalium epiphise-  
 » ses hinc excitatus tumor qui nihil aliud est quam spina  
 » bifida. «

En totam morbi theoriam paucis dilucidissimè expressam, è quâ facili negotio erui potest symptomatum omnium explicatio.

(a) Illust. D. Imbert, tract. de tum. pag. 270.



Causas remotas spinæ bifidæ easdem esse ac hydrocephalū spontè patet, hinc ex ejus historiâ petendæ sunt.

Semper lethalem esse tumorem illum docent omnia observata, seriùs tamen ociùsve mortem infert prout seriùs vel citiùs aperitur. Nullam radicalem curam admittit. Hinc de palliativâ tantummodò sollicitus esse debet Medicus; hæc autem in eo consistit ut tumoris apertio retardetur, cavendo à nimia compressione, & à quâcumque applicatione externâ; nec hætenùs ulli chimico innotescit medicamentum aliquod quo possit vel radicitùs curari vel palliari; undè experientia freti concludimus.

*Ergò Spina bifida non est morbus sanabilis, nec chimia ulla remedia suppeditat quibus possit radicitùs curari vel palliari.*

---

### E R R A T A.

Pag. 6. lin. 15. lege naturali major vel minor.  
Cætera Lector benevolus emendabit.